

03/05/1997

Dr Mahathir pemimpin tunggal dari luar Afrika

Zainuddin Ayip in Gaborone (Botswana)

GABORONE (Botswana) Jumaat - Datuk Seri Dr Mahathir Mohamad adalah pemimpin tunggal dari luar benua Afrika yang menghadiri dialog Antarabangsa Selatan Afrika 1997 selama tiga hari di Kasane, utara negara ini, bermula Ahad ini.

Perdana Menteri dijadual berbincang dengan 14 pemimpin negara Afrika mengenai kerjasama Selatan-Selatan dan peluang pelaburan Malaysia di negara Selatan Afrika.

Dialog sulung bertemakan 'Perkongsian Pintar Untuk Generasi Masa Depan Penduduk Selatan Afrika' itu akan dihadiri semua pemimpin sembilan negara yang menganggotai Komuniti Pembangunan Selatan Afrika (SADC).

Tetamu kehormat dialog itu ialah Presiden Botswana, Ketulime Masire; Presiden Malawi, Bakali Muluzi; Presiden Namibia, Sam Nujoma dan Presiden Zimbabwe, Robert Mugabe.

Selain Dr Mahathir, pemimpin negara lain yang diundang ialah Jerry Rawlings dari Ghana dan Yuwari Museveni dari Uganda.

Gagasan Perkongsian Pintar diilhamkan di Malaysia ketika Presiden Botswana menghadiri dialog Antarabangsa Langkawi Kedua, Julai tahun lalu.

Selain mengadakan perbincangan dua hala dengan Ketumile, Dr Mahathir dijadualkan berucap di majlis itu mengenai kerjasama Selatan-Selatan dan peluang pelaburan yang boleh disertai Malaysia di Selatan Afrika.

Setakat ini, tiada pelaburan Malaysia di Botswana, negara pengeluar permata berlian terbesar dunia daripada segi nilai. Tahun lalu, perdagangan Malaysia-Botswana hanya RM1.35 juta, berbanding RM540,000 pada tahun sebelumnya.

Sementara itu, Presiden Botswana memberitahu wartawan tempatan, dialog di Kasane cukup penting untuk mengajak lebih ramai pelabur asing turut membangunkan negara di Selatan Afrika.

"Dialog ini bukanlah alternatif untuk mewujudkan pasaran ekonomi bebas, sebaliknya memberi keberkesanan dan memantapkan pembangunan ekonomi," kata Masire.

Mengenai perkongsian pintar, beliau berkata konsep itu adalah peluang terbaik untuk memastikan semua pihak mendapat manfaat.

Beliau yakin menerusi dialog itu akan terjalin hubungan erat antara kerajaan, ahli perniagaan, sektor swasta dan pekerja.

"Saya yakin dialog ini akan menjadi asas peralihan dan pertumbuhan ekonomi di negara Selatan Afrika dalam menuju era pembangunan ekonomi dunia," katanya.

Menerusi dialog itu, semua negara peserta berpeluang memajukan negara masing-masing dengan matlamat sama.